

E realidad ta bisto

Fuera di tin adiccion di droga, Aruba tin un cultura di alcohol

ORANJESTAD – Awendia ta haya cu henter ora hende ta papia cu Aruba ta un pais cu ta adicto na alcohol. Nos tin un cultura di alcohol, cual realmente por mira cu tur cos aki na Aruba ta caba cu alcohol. Segun presidente di Adopt an Addict, Sra. Audrey Croes-Lacle, tur campaña, tur fiesta, ta caba na alcohol. E bar ta esun cu tin cu ta genera placa.

UN FUNDRAISING SIN ALCOHOL NO TA UN EVENTO

No por haci un actividad pa crea fondo sin alcohol. Esaki ta un fenomeno di tur evento social cu ta wordo haci, sea cu ta un teleton, un creamento di fondo politico, of pa conscientisacion. No tin un evento social cu no tin un bar cu ta provee alcohol, sea cu ta cerbes of bebidanan sterki. Ora cu un fundacion cu ta proteha

hendenan contra adiccion, ta dificil, pasobra e fondonan cu ta wordo recauda ta minimal, mirando cu e eventonan aki hopi biaha ta liber di alcohol.

ARUBA NO TA CLA PA CANNABIS

BON DIA ARUBA a puntra Sra. Croes-Lacle riba e hecho di legalisacion di cannabis na Aruba, cual el a bisa un NO definitivo. Adopt an Addict, conhuntamente cu 12 otro fundacion cu ta traha riba cuida di adiccion a firma un acuerdo y a dicidi unanimamente cu nan ta contra di legalisacion, pasobra estadistica ta muestra cu nos huentud of datonan di hendenan naci prome cu aña 1950, a cuminsa e adiccion cu practicamente dos of tres bebida y for di eynan e siguiente paso tabata marihuana, c.q. droga. Na momento cu a bin e propagacion politico di legalisacion

di marihuana, un no grandi a cay. Aruba no ta cla pa tuma e paso ey.

MARIHUANA MEDICINAL TA RIBA UN LIÑA DIFERENTE

Segun Sra. Croes-Lacle, marihuana den sentido medicinal ta completamente diferente. Un capitulo riba su mes. Si un hende kier uza cannabis pa mara pia pa cura un herida por ehempel, of pa bebe contra dolor pasobra tin un cancer terminal, ta totalmente diferente. E ora ta OK pa uza, pero semper bay cu mester wordo investiga door di científico y dokterman cu por bisa kico e efecto por ta.

UN BISTA ROBEZ

Na momento cu un politico cuminsa propaga legalisacion di marihuana, e ta duna un bista robes na e pueblo y ta muestra hende cu ta uza mari-



huana, cu ta OK pa haci. Na Aruba por mira hopi famia cu ta sufri bao di e circunstancia aki y con e cambio di caracter di e hendenan ta ora cu nan ta uza marihuana. Masha poco hende tin un efecto positivo di dje ora cu nan ta uza marihuana. Mester bay mas

profundo riba e problematica di adiccion riba cualkier cos, no traha solamente riba adiccion di marihuana/cocaina of crack of otro droga. Tin hopi hende cu tambe ta adicto na alcohol. Alcohol tambe ta un droga cu ta wordo permiti socialmente. □